

BULETIN

BIL 146 (03/2019) / JUL-SEP 2019

MIMBAR

WARTA KEGIATAN LEMBAGA AMANAH KEBAJIKAN MASJID NEGERI SARAWAK

PERCUMA

**3500 JEMAAH HADIR TUNAIKAN
SEMBAHYANG HAJAT
PEPERIKSAAN AWAM 2019**





لِبَاتِكَ امَانَةَ كَبِيْرَكَعْ مَسْجِدِ نَكْرُنْ سَراوْقَ
LEMBAGA AMANAH KEBAJIKAN MASJID NEGERI SARAWAK

SIDANG REDAKSI

PENAUNG

Yang Berbahagia Tan Sri Datuk Amar Haji Bujang bin Mohd. Nor
Setiausaha Kehormat
Lembaga Amanah Kebajikan Masjid Negeri Sarawak

PENASIHAT

Tuan Haji Mohamad Sabry bin Haji Othman
Pengurus Besar
Lembaga Amanah Kebajikan Masjid Negeri Sarawak

EDITOR

Megawati binti Haji Julaihi
Ketua Sektor Pentadbiran dan Pengurusan

Nona Zaharia binti Fadzil
Ketua Sektor Kewangan

PENGARANG

Abang Bikusary bin Haji Kadir
Ketua Bahagian Aset dan Fasiliti

Haryati binti Mohamad
Ketua Bahagian Penyelidikan dan Pembangunan

Noratini binti Sebri
Ketua Bahagian Pengurusan Sumber Manusia
(Group HR LAKMNS)

Haji Poniman bin Margiman
Ketua Bahagian Keselamatan

Haji Mohamad Nidzam bin Ahmad
Pegawai Bahagian Pentadbiran dan Pengurusan

Dayang Siti Aishah binti Haji Mohamad Atei
Pegawai Bahagian Pelajaran

Mohamad Aizat bin Morshidi
Pegawai Bahagian Masjid-Masjid

PENOLONG PANEL EDITOR

Misiah binti Haji Wajhi
Guru Akademik MATTARY

Rahimah binti Ariffin
Guru Akademik MATTARY

Azlyn binti Abdul Rahman
Guru Akademik MATTARY

Nurul Iksan binti Bohari
Guru Akademik MATTARY

Wacana Pengarang

Dengan nama Allah Yang Maha Pemurah Lagi Maha Penyayang, syukur atas segala limpah kurniaan Nya kepada kita. Selawat dan salam buat Baginda Rasulullah S.A.W., kepada ahli keluarga Baginda, para sahabat Baginda.

Assalamualaikum warahmatullahi wabarakatuh

Alhamdulillah, bersyukur ke hadrat Allah SWT, kerana dengan izin dan limpah kurnia-Nya kita dipertemukan lagi di bulan-bulan istimewa ini iaitu bulan Syawal dan bulan Zulhijjah yang penuh barakah sekaligus bulan kemerdekaan bagi kita rakyat malaysia negaraku tanah air tercinta.

Dalam bulan Syawal yang penuh barakah dan keampunan ini, pengarang menyeru agar kita semua mengambil peluang mengeratkan lagi silaturrahim sesama umat Islam di Malaysia khususnya di bumi kenyalang tercinta ini. Hubungan baik sesama manusia atau Habluminannas adalah sangat ditutut di dalam islam.

Di samping itu tidak lupa juga bulan Zulhijjah dan bulan kemerdekaan, kedua-duanya berkisar tentang bulan yang penuh dengan kisah pengorbanan. Dengan ini pengarang mengambil kesempatan untuk berpesan agar semua umat Islam menghayati erti sebenar pengorbanan yang kita raikan saban tahun ini. Berkorbanlah dengan niat tulus ikhlas kerana Allah SWT serta tunaikanlah kewajipan kita sebagai khalifah di muka bumi ini.

Sebagai tanda syukur pada nikmat Allah SWT kurniakan kepada kita, nilai-nilai ini digambarkan dan disemarakkan melalui pelbagai program dan aktiviti anjuran LAKMNS yang diadakan sepanjang bulan Syawal dan Zulhijjah ini di pelbagai tempat antaranya Masjid Jamek Negeri Sarawak, Masjid Bandaraya Kuching dan Ma'had Tahfiz Tun Abdul Rahman Ya'kub (MATTARY).

Pelbagai majlis dan aktiviti telah dilaksanakan antaranya Majlis Sambutan Ramah Tamah Aidilfitri, Majlis Sambutan Bulan Kemerdekaan, Majlis Sambutan Maal Hijrah, Majlis Sembahyang Hajat Peperiksaan Awam 2019 dan pelbagai lagi diadakan dengan jayanya. Majlis-majlis seperti ini menjadi aspirasi LAKMNS dalam mengeratkan silaturrahim sesama muslim di bumi kenyalang tercinta ini. Sabda Nabi SAW : "Sesiapa ingin dilapangkan baginya rezekinya dan dipanjangkan untuknya umurnya hendaknya dia menyambung silaturrahim." (HR Bukhari dan Muslim)

Akhir kalam, marilah sama-sama kita manfaatkan sepenuhnya kelebihan yang ada pada dua bulan yang penuh kemuliaan ini agar dapat menjadi amal jariah yang berterusan. Semoga usaha dan penat lelah kita di dunia ini akan dikurniakan ganjaran sewajarnya daripada Allah SWT di akhirat kelak. In sha Allah.

Sekian, wassalam.

BULETIN MIMBAR EDISI 146 (JUL-SEP 2019)



KANDUNGAN



06



12



07

- 18 Program Hari Kebangsaan Peringkat MATTARY**
- 19 Bengkel Pemantapan Pengajian Dan Pengurusan Kelas Al Quran**
- 20 Bijak Kewangan Demi Masa Depan**
- 21 Kursus Pra Perkahwinan**
- 22 Pengurusan Kewangan**
- 23 Sudut Hafiz Cilik**
- 23 Profil Warga Kakitangan LAKMNS**

- 4 Lawatan dan Imarah Masjid**
- 5 Malam Kerohanian - Sambutan Maal Hijrah 1441H**
- 6 Majlis Sembahyang Hajat Peperiksaan Amam 2019**
- 7 Lawatan Johor Corporation (JCOP) ke Tanah Perkuburan Islam Samariang**
- 8 Kursus Penyeliaan Polis Bantuan, LAKMNS**
- 9 Majlis Sambutan Kemerdekaan di TATTARY**
- 10 Ramah Tamah Aidilfitri TATTARY**
- 11 Bengkel Motivasi Dan Teknik Menjawab Soalan PT3**
- 12 Bengkel Motivasi Dan Teknik Menjawab Soalan UPSR**
- 13 Psikologi Dan Kaunseling - Apakah Kesihatan Mental**
- 14 Berita Bergambar**
- 16 Seruan Mimbar**

LAWATAN SILATURAHIM, PENYEBARAN MAKLUMAT DAN PENGIMARAHAN MASJID DAN SURAU



Program Lawatan Silaturahim, Penyebaran Maklumat dan Pengimaran Masjid dan Surau yang dilaksanakan oleh Unit Penyelaras Kegiatan, Bahagian Masjid – Masjid, Lembaga Amanah Kebajikan Masjid Negeri Sarawak diteruskan dalam Bulan Julai hingga September 2019.

Oleh yang demikian, beberapa buah surau dikunjungi sempena program ini yang bertujuan untuk mengeratkan jalinan ukhuwah di samping berkongsi maklumat mengenai Lembaga Amanah Kebajikan Masjid Negeri Sarawak. Hanya 7 buah masjid dan surau yang dapat dikunjungi sepanjang tiga bulan tersebut. Destinasi yang telah diziarahi ialah :

1. Masjid Darul Ehsan, Kampung Tanjung Tuang, Samarahan – 5 Julai 2019
2. Surau Darul Ibadah, Kampung Rayu Melayu, Kuching – 19 Julai 2019
3. Masjid Ali Fatimah, Kampung Mang, Samarahan – 2 Ogos 2019
4. Masjid Nurul Islam, Kampung Pinang, Samarahan – 9 Ogos 2019
5. Masjid Al-Bugisiah, Kampung Pelandok Ulu, Asajaya – 23 Ogos 2019
6. Masjid As Solihin, Kampung Sambir, Asajaya – 13 September 2019
7. Masjid Darul Musyrafah, Kampung Muhibbah, Seberang Pending – 20 September 2019



Pengisian program memuatkan beberapa atur cara yang dimulai dengan kata aluan jawatankuasa masjid atau surau. Kemudian disusuli dengan taklimat ringkas oleh Pegawai Unit Penyelaras Kegiatan mengenai sejarah dan latar belakang, peranan dan aktiviti di bawah Lembaga Amanah Kebajikan Masjid Negeri Sarawak. Atur cara juga diselitkan dengan Tazkirah Agama mengenai Kepentingan Mengimarahan Masjid yang disampaikan oleh Ustaz Arif bin Suhadat dan Ustaz Zaimi bin Sakawi. Melalui pengisian program ini diharap dapat meningkatkan persefahaman di antara institusi masjid dan pihak LAKMNS.

Malam Kerohanian

SAMBUTAN MAAL HIJRAH 1441H

“Negara Rahmah Ummah Sejahtera”

Mukmin berjaya melakukan penghijrahan dalam diri untuk mendapat kehidupan lebih baik. Hijrah bukan sahaja dari sudut material, malah menyeluruh meliputi fizikal dan rohani. Ia bukan sekadar memperingati peristiwa hijrah Nabi Muhammad SAW dan sahabat dari Mekah ke Madinah, sebaliknya membawa hikmah cukup besar apabila kaum Muhajirin dan Ansar dipersaudarkan, manakala Islam mula berkembang dan tersebar ke seluruh pelosok dunia.

Bersempena menyambut tahun baharu Hijrah ini, pelbagai program telah dirancang di masjid-masjid dan surau-surau sekitar Bandar raya Kuching termasuklah Unit Penyelaras Kegiatan, Bahagian Masjid-Masjid, Lembaga Amanah Kebajikan Masjid Negeri Sarawak juga mengadakan Program Sambutan Malam Kerohanian sempena Sambutan Maal Hijrah 1441H pada 31 Ogos 2019 bersamaan dengan 1 Muhamarram 1441H di Masjid Jamek Negeri Sarawak bermula jam 6.00 petang. Antara pengisian yang dijalankan ialah bacaan Doa Akhir Tahun dipimpin oleh Al-Fadhil Ustaz Syed Abdul Aziz bin Wan Yusuf, Penolong Imam Besar Negeri Sarawak dan kemudian solat Maghrib berjemaah serta bacaan Doa Awal Tahun.

Program ini juga disusuli dengan ceramah agama selari dengan tema “Negara Rahmah Ummah Sejahtera” oleh penceramah jemputan iaitu Ustaz Mohd Faizal bin Abdullah yang merupakan Pegawai Hal Ehwal Islam di Jabatan Mufti Negeri Sarawak.

Dalam intipati ceramah beliau menceritakan perjalanan Hijrah Rasulullah SAW dari Kota Mekah ke Kota Madinah hingga terbentuklah sebuah masyarakat Islam, satu masyarakat contoh yang hidup dalam keadaan aman dan damai, masyarakat yang berkasih sayang serta bertimbang rasa tanpa memandang keturunan, kaum, warna kulit dan bangsa.

Beliau juga berharap kepada kira-kira 500 orang jemaah yang hadir pada malam tersebut menjadikan peristiwa Hijrah ini sebagai pedoman dan penunjuk jalan bagi kita menuju kemajuan dan kecemerlangan ummah yang direhdai Allah SWT dunia dan akhirat.



SEMBAHYANG HAJAT PEPERIKSAAN AWAM 2019

Pada 8 Ogos 2019 bersamaan 7 Zulhijjah 1440H bertempat di Masjid Jamek Negeri Sarawak telah berlangsung Majlis Sembahyang Hajat Peperiksaan Awam 2019. Majlis ini dianjurkan setiap tahun oleh LAKMNS sebagai tanda sokongan kepada pelajar yang akan menduduki peperiksaan awam dengan mendoakan ketetapan hati mereka agar lebih yakin dan diberikan kejayaan dalam peperiksaan yang dihadapi.

Sebanyak 51 buah sekolah di sekitar Kuching dan Padawan telah dijemput ke Majlis Sembahyang Hajat ini. Alhamdulillah, jumlah kehadiran pada malam tersebut sangat memberangsangkan dengan kehadiran seramai lebih kurang 3500 orang pelajar dan ibu bapa selain masyarakat awam setempat.

Majlis Sembahyang Hajat telah dimulakan dengan Solat Maghrib berjemaah yang dipimpin oleh Al-Fadhl Ustaz Haji Muhammad Ihsan bin Haji Haidzir, Timbalan Imam Besar Negeri Sarawak dan diikuti dengan bacaan Yaasin serta zikir dan munajat. Seusai pengisian tersebut majlis diteruskan dengan Solat Isya' berjemaah dan Solat Sunat Hajat yang diketuai oleh Al Fadhl Ustaz Mohd Safwan Bin Mahli Al Hafiz.

Syukur ke hadrat Allah swt. kerana dengan izinNya majlis pada kali ini mendapat sambutan dan berjalan lancar. Semoga majlis ini mampu meningkatkan kesedaran khususnya di dalam diri pelajar dan umat Islam amnya betapa pentingnya kita mendekatkan diri dan berserah sepenuhnya kepada Allah SWT bagi menentukan hasilnya setelah kita berusaha.



LAWATAN JOHOR CORPORATION (JCORP) KE TANAH PERKUBURAN SEMARIANG

Pada 17 Julai 2019, Lembaga Amanah Kebajikan Masjid Negeri Sarawak (LAKMNS) telah menerima satu kunjungan dari rombongan Waqaf An-Nur Corporation Berhad yang bertujuan untuk mengadakan sesi lawatan ke Tanah Perkuburan Semariang bagi mempelajari konsep dan kaedah pengurusan Tanah Perkuburan Semariang supaya dapat diaplikasi dalam pelaksanaan Tanah Perkuburan Masjid Sultan Iskandar Bandar Dato' Onn, Johor Baharu.



Lawatan ini telah disertai oleh dua wakil dari Waqaf An-Nur Corporation Berhad iaitu Tuan Haji Zamri bin Norani (Pengurus Besar, Waqaf An-Nur Corporation Berhad) dan Encik Mohd Nazarudin bin Ali (Pengurus, Waqaf An-Nur Corporation Berhad). Lawatan ini juga telah disambut oleh wakil daripada pihak Lembaga Amanah Kebajikan Masjid Negeri Sarawak iaitu Tuan Haji Mohamad Nidzam Bin Ahmad, Pegawai, Bahagian Pentadbiran, Encik Abang Bikusary Bin Haji Kadir, Ketua, Bahagian Fasiliti dan Aset, wakil Pentadbiran Masjid Jamek dan juga pegawai dari Unit Pentadbiran Dan Pengurusan, Tanah Perkuburan Semariang.

Penerangan berkenaan dengan konsep pengurusan Tanah Perkuburan Semariang telah diterangkan oleh Encik Amdi bin Japar, Ketua Unit Pentadbiran Dan Pengurusan Tanah Perkuburan Semariang berkenaan dengan sejarah penubuhan Tanah Perkuburan Semariang dan juga perkhidmatan yang disediakan di Tanah Perkuburan Semariang. Encik Amdi Bin Japar juga telah menerangkan tentang beberapa peraturan yang harus dipatuhi oleh ahli keluarga waris di Tanah Perkuburan Semariang untuk pembinaan bakut/napor hendaklah mengikut spesifikasi yang telah ditetapkan berpaduan dengan panduan daripada Jabatan Mufti Negeri Sarawak.

Penerangan berkenaan dengan aplikasi digital "E-Cemetery" juga telah diterangkan iaitu sistem ini telah diperkenalkan pada 18 Mei 2018 oleh Yang Amat Berhormat Datuk Patinggi (Dr) Abang Haji Abdul Rahman Zohari bin Tun Datuk Abang Haji Openg, Ketua Menteri Sarawak merangkap Penggerusi Lembaga Amanah Kebajikan Masjid Negeri Sarawak. Sistem ini adalah untuk memudahkan pencarian nama dan lokasi penempatan jenazah oleh ahli keluarga di Tanah Perkuburan Semariang.

Lawatan ke Tanah Perkuburan Semariang juga telah diadakan untuk melihat suasana di Tanah Perkuburan Semariang dan juga cara pengurusan untuk pengebumian di Tanah Perkuburan Semariang dan berharap perkongsian ini dapat membantu dalam memudahkan pengurusan.



Kursus Penyeliaan POLIS BANTUAN, LAKMNS

Kursus Penyeliaan Polis Bantuan, LAKMNS telah diadakan pada 4 Ogos 2019 bertempat di Bilik Kuliah, Pusat Pengajian Al-Quran Tun Abdul Rahman Ya'kub (PATARY). Kursus ini telah diadakan selama dua hari dan disertai oleh 30 orang anggota Polis Bantuan pelbagai pangkat yang terdiri daripada Inspektor, Sarjan Mejar, Sarjan dan Koperal. Ianya telah dikendalikan oleh ASP Mohamad Nizam bin Bujang, Pegawai Kanan dari Pusat Latihan Polis (PULAPOL) Kuching.



Kursus Penyeliaan ini merupakan satu langkah dan keperluan untuk memperkasakan pelaksanaan tugas agar lebih efektif dan efisien. Kursus ini juga adalah sebagai pemangkin kepada keberkesanan dan kemantapan tugas yang dilaksanakan.

Objektif kursus ini diadakan adalah untuk memperkasakan modal insan anggota Polis Bantuan, LAKMNS supaya lebih kompeten dan mantap dalam menjalankan tugas penyeliaan dan pemantauan.

Selain itu, kursus ini juga memberi pendedahan kepada anggota Polis Bantuan, LAKMNS akan tanggungjawab dan peranan sebagai seorang penyelia dalam melaksanakan tugas dengan lebih komited dan berkesan.

Di samping itu, dengan adanya Kursus Penyeliaan ini dapat mengajar kaedah penyeliaan yang sempurna dan berkesan sambil menitikberatkan disiplin dan tatatertib dengan pengetahuan dalam bidang kerja selaras dengan perkembangan semasa.

Anggota Polis Bantuan juga didekah dengan tugas-tugas penyeliaan dalam memimpin dan memberi tunjuk ajar kepada anggota bawahan dalam bidang kerja yang dilakukan.

Kursus ini turut memperkasakan tahap profesionalisme anggota Polis Bantuan, LAKMNS melalui proses pembelajaran dan latihan yang berterusan serta konsisten.

Sejajar dengan pelaksanaan tugas yang lebih meluas di bawah bidang kuasa Polis Bantuan, diharapkan dengan adanya Kursus Penyeliaan Polis Bantuan ini dapat memberi impak yang positif terhadap keberkesanan tugas dan pemantauan keselamatan demi menjaga kepentingan LAKMNS.



MAJLIS SAMBUTAN KEMERDEKAAN TATTARY

Program Sambutan Bulan Kemerdekaan telah diadakan di TATTARY untuk menyambut bulan kemerdekaan yang ke-62 di samping sambutan Hari Sarawak dan Hari Malaysia pada tahun ini. Objektif lain program ini adalah sebagai salah satu usaha untuk memupuk dan menyemarakkan perasaan, suasana dan semangat kemerdekaan dalam diri warga TATTARY khususnya anak-anak.

Pelbagai aktiviti dan pertandingan telah diadakan sepanjang bulan kemerdekaan yang melibatkan para guru dan murid TATTARY. Antara pertandingan yang dijalankan ialah Pertandingan Hiasan Sudut Kelas yang bertemakan kemerdekaan. Pertandingan ini melibatkan gabungan kreativiti antara guru dan murid bagi setiap kelas. Manakala pertandingan lain ialah Pertandingan Melukis Poster Bertemakan Bulan Kemerdekaan di mana ia melibatkan hasil kerja dan kreativiti daripada guru-guru sepenuhnya bagi setiap kelas. Selain itu, turut diadakan pertandingan bagi murid sahaja iaitu Pertandingan Mewarna Lukisan Kemerdekaan bagi murid-murid 4, 5 dan 6 tahun.



Kemuncak bagi Program Sambutan Bulan Kemerdekaan TATTARY ialah Majlis Penutupan Sambutan Bulan Kemerdekaan TATTARY yang telah diadakan dengan pada 26 Ogos 2019 bersamaan 25 Zulhijjah 1440H. Majlis ini diadakan di Anjung Kiri Masjid Jamek Negeri Sarawak bermula pada jam 2 petang. Majlis dihadiri oleh para guru, kakitangan, murid-murid dan diserikan lagi dengan kehadiran Penyelia TATTARY, Puan Afnalizan binti Ali.

Majlis diisi dengan pelbagai persembahan seperti persembahan lagu Kemerdekaan oleh murid-murid dari kelas 5 dan 6 tahun yang dipimpin oleh guru kelas masing-masing. Bakat dan potensi murid turut berjaya dicungkil melalui persembahan Senaman Irama Kemerdekaan oleh murid-murid 4 tahun dan Deklamasi Sajak Kemerdekaan oleh murid 5 tahun. Akhir sekali, semua warga TATTARY bersama-sama berarak sambil membawa sepanduk kemerdekaan di perkarnagan Anjung Kiri Masjid Jamek Negeri Sarawak.

Semoga aktiviti seumpama ini mampu mewujudkan rasa kekitaan, meningkatkan semangat kerja berpasukan dan seterusnya mengeratkan ukhuwah dalam kalangan warga TATTARY.



Majlis Sambutan Ramah Tamah Aidilfitri TATTARY

Majlis sambutan Ramah Tamah Aidilfitri peringkat TATTARY telah diadakan pada penghujung Syawal 1440H iaitu 2 Julai 2019 bersamaan 28 Syawal 1440H. Majlis ini diadakan di Anjung Kiri Masjid Jamek Negeri Sarawak bermula seawal jam 9 pagi. Majlis dihadiri semua warga TATTARY dan juga dimeriahkan dengan kehadiran Wakil Ketua Bahagian Pelajaran, Wakil Ketua Bahagian Masjid-masjid dan Pegawai dari Pusat Kecemerlangan MASJA-SA.

Majlis ini diadakan bertujuan untuk meraikan kehadiran bulan Syawal di samping mengeratkan lagi hubungan silaturahim antara warga TATTARY dan kakitangan LAKMNS yang bertugas di Masjid Jamek Negeri Sarawak. Pelbagai aktiviti dan pertandingan telah diselitkan dalam majlis ini antaranya nyanyian dan tarian lagu raya retro oleh murid-murid 4, 5 dan 6 tahun. Selain itu, tiga jenis pertandingan turut dianjurkan bagi memeriahkan lagi majlis tersebut antaranya pertandingan Busana Terindah Raya oleh murid-murid 4, 5 dan 6 tahun, pertandingan Mereka Cipta Kad Raya gandingan antara murid-murid dan guru kelas masing-masing. Pertandingan terakhir pada penghujung majlis yang paling meriah ialah Dekorasi Kek Raya yang disertai oleh wakil guru setiap kelas.



Selesai sambutan majlis, guru-guru, murid-murid dan kakitangan-kakitangan yang ada di Masjid Jamek Negeri Sarawak bersama-sama berkunjung dari kelas ke kelas untuk menikmati juadah raya yang disediakan. Menariknya, hampir kesemua juadah yang dihidangkan ialah juadah yang dimasak dan disumbangkan oleh ibu bapa murid TATTARY dan tidak kurang pula disediakan oleh guru-guru TATTARY sendiri.

Majlis bertambah meriah dengan sokongan semua pihak yang hadir berpakaian raya berwarna-warni pada hari tersebut. Diharapkan agar keharmonian seperti ini terus berkekalan pada masa akan datang.



BENGKEL MOTIVASI DAN TEKNIK MENJAWAB SOALAN PENTAKSIRAN TINGKATAN 3 (PT3) UNTUK TAHUN 2019

Bengkel Motivasi dan Teknik Menjawab Soalan Pentaksiran Tingkatan 3 (PT3) untuk tahun 2019 anjuran Bahagian Penyelidikan dan Pembangunan dengan kerjasama Bahagian Pelajaran, LAKMNS telah diadakan pada 24 dan 25 Ogos bertempat di bilik Kuliah, Kompleks PATARY.

Program yang diadakan secara tahunan ini diadakan khusus untuk pelajar-pelajar di Pusat Kecemerlangan MASJA-SA dan anak kakitangan LAKMNS dalam usaha untuk membantu para pelajar bersedia dalam menghadapi peperiksaan PT3. Melalui bengkel ini para pelajar didedahkan dengan tip serta teknik menjawab soalan peperiksaan yang disampaikan oleh penceramah jemputan yang bertauliah dan berpengalaman di samping berpeluang untuk bertanya secara langsung dengan penceramah tentang permasalahan yang sering dihadapi oleh para pelajar sebelum dan ketika menjawab soalan peperiksaan.

Seramai 29 orang pelajar Tingkatan 3 telah menghadiri bengkel PT3 kali ini dengan membincangkan mata pelajaran teras seperti subjek Bahasa Malaysia, Bahasa Inggeris, Matematik dan Sains. Pihak penganjur turut menyelitkan slot motivasi serta segmen inspirasi di dalam bengkel ini bagi memberi semangat dan dorongan kepada pelajar dalam menghadapi hari peperiksaan.

Para penceramah yang terlibat dalam bengkel ini adalah terdiri daripada tenaga pengajar yang berpengalaman dalam mengajar subjek-subjek teras PT3 serta merupakan pemeriksa dan pentaksir kertas peperiksaan PT3 peringkat negeri dan kebangsaan. Bagi slot motivasi pula, pihak penganjur telah menjemput tenaga pengajar dari SMK Hajjah Laila Taib, Kota Samarahan dalam mengendalikan segmen tersebut.

Pihak penganjur mengharapkan agar bengkel ini dapat diteruskan untuk tahun-tahun yang akan datang dalam usaha pihak LAKMNS untuk sama-sama membantu pelajar-pelajar Pusat Kecemerlangan MASJA-SA serta anak-anak kakitangan LAKMNS dalam menghadapi peperiksaan penting seperti PT3.



BENGKEL MOTIVASI DAN TEKNIK MENJAWAB SOALAN UJIAN PENILAIAN SEKOLAH RENDAH (UPSR) UNTUK TAHUN 2019

Lembaga Amanah Kebajikan Masjid Negeri Sarawak (LAKMNS) amat prihatin dan peka tentang persediaan para pelajar dalam menghadapi setiap peperiksaan awam. Sehubungan itu, untuk tahun 2019, Bahagian Penyelidikan dan Pembangunan dengan kerjasama Bahagian Pelajaran telah menganjurkan Bengkel Motivasi dan Teknik Menjawab Soalan Ujian Penilaian Sekolah Rendah (UPSR) pada 28 dan 29 Julai 2019 di bilik Kuliah, Kompleks PATARY.

Program dua (2) hari yang diadakan secara tahunan ini dijalankan bertujuan untuk membantu para pelajar agar lebih bersedia dalam menghadapi peperiksaan dengan tip serta panduan menjawab soalan daripada penceramah bertauliah. Melalui bengkel seperti ini juga para pelajar berpeluang untuk bertanya secara langsung dengan penceramah tentang permasalahan yang sering dihadapi oleh para pelajar sebelum dan ketika menjawab soalan peperiksaan.

Seramai 81 orang pelajar Tahun 6 yang terdiri daripada pelajar Ma'had Tahfiz Tun Abdul Rahman Ya'kub (MATTARY), Pusat Kecemerlangan MASJA-SA serta anak-anak kakitangan LAKMNS telah menghadiri bengkel ini. Subjek-subjek yang ditekankan dan dikongsikan oleh para penceramah merupakan mata pelajaran teras seperti Bahasa Malaysia, Bahasa Inggeris, Matematik dan Sains. Selain itu, bengkel ini juga turut menyelitkan slot motivasi dan keyakinan diri serta segmen inspirasi dan motivasi.



Para penceramah yang dijemput untuk menyampaikan ceramah adalah terdiri daripada tenaga pengajar yang berpengalaman dalam subjek-subjek teras UPSR dan juga merupakan pemeriksa dan pentaksir kertas peperiksaan UPSR peringkat negeri dan kebangsaan.

Bahagian Penyelidikan dan Pembangunan juga turut menjemput tenaga pengajar dari SMK Hajah Laila Taib, Kota Samarahan bagi mengendalikan segmen motivasi untuk para peserta sebagai persediaan sebelum memasuki dewan peperiksaan.

Adalah diharapkan agar program yang bermanfaat seperti ini dapat diteruskan pada tahun-tahun yang akan datang dalam usaha pihak LAKMNS untuk sama-sama membantu anak-anak Islam di negeri Sarawak amnya dan di Kuching khasnya dalam mencapai kejayaan dalam pelajaran.



APAKAH KESIHATAN MENTAL?

Daripada: Unit Pengurusan Psikologi dan Kaunseling, Nur Amirah Sharkawi

Kesihatan mental ialah situasi di mana seseorang individu menyedari potensinya boleh berdaya tindak terhadap stres kehidupan, boleh bekerja dengan produktif dan boleh menyumbang kepada masyarakat.

Kesihatan mental juga merujuk kepada:

- Cara kita berfikir, merasa dan cara kita bertindak
- Cara kita menghadapi masalah dan mengatasinya.
- Cara kita berinteraksi dengan orang lain.

Apakah yang mempengaruhi kesihatan mental?


- Cara/corak asuhana seseorang
- Tahap pendidikan
- Agama dan budaya hidup
- Pengaruh persekitaran (rakan sebaya, guru-guru)
- Keistimewaan, kelemahan dan pencapaian seseorang.
- Kesihatan fizikal

Tanda dan Gejala

Fisiologikal – ia menyebabkan seseorang itu cenderung untuk mendapat atau memburukkan lagi penyakit fizikal seperti penyakit jantung dan darah tinggi, menyebabkan sakit kepala dan kesakitan otot.

Tingkah laku – prestasi kerja mungkin menurun, cenderung untuk mengalami kemalangan, tidak hadir bertugas, bertindak agresif dan mudah marah, sukar membuat keputusan dan menyelesaikan masalah.

Psikologi – timbul rasa tidak puas hati, mudah terasa, murung dan berasa penat secara emosi. Antara gejala biasa yang menunjukkan kesihatan mental terjejas adalah panas baran, sukar tidur, hilang selera makan, turun berat badan, gemuruh, berdebar-debar dan tidak bersemangat.



5 Tips menangani tekanan

Aktif – aktiviti fizikal dapat membantu mengosongkan minda, supaya dapat mengenal pasti punca tekanan dan mampu menyelesaikan masalah dalam keadaan lebih tenang.


Positif – jadikan kebiasaan untuk menulis perkara yang anda syukuri pada setiap hari agar ia membantu kita untuk berpandangan lebih positif.

Masa untuk “me-time” – meluangkan masa bersendirian dan melakukan aktiviti yang disukai adalah penting. Contoh: bersenam, bersantai, bersosial.

Cabar diri anda – belajar benda baharu seperti belajar bahasa asing, sukan atau skil yang baharu – ini akan membantu kita menjadi lebih berdaya tahan dari segi emosi

“Make connections” – berkongsi masalah antara cara untuk kita kurangkan tekanan. Pastikan kita mempunyai sistem sokongan yang baik.

Tip yang menarik akan dikongsi dengan lebih mendalam pada perkongsian yang akan datang. Ingat, tidak ada kesihatan tanpa kesihatan mental.





LAWATAN ROMBONGAN DARI MASJID SARIKEI



MAJLIS PERSARAAN KOPERAL MUSA BIN KIBEN





SEMINAR ZAKAT UNTUK KAKITANGAN



MAJLIS TAKLIM DI MASJID BANDARAYA KUCHING



SERUAN **MIMBAR**

“FALSAFAH IBADAH HAJI DAN KORBAN”
(26 Julai 2019M/ 23 Zulkaedah 1440H)
Sumber: <http://www.mis.sarawak.gov.my/>

“Falsafah Ibadah Haji Dan Korban”

Kaum muslimin yang dirahmati Allah S.W.T.,

Kaum muslimin yang dirahmati Allah,

Marilah kita bersama-sama mempertingkatkan keimanan, ketakwaan dan semangat ukhuwah dalam kehidupan sehari-hari. Ini kerana dengan keimanan dan ketakwaan yang jitu serta ukhuwah yang kukuh akan menjadi wadah untuk kita mencapai kebahagiaan dan kesejahteraan hidup di dunia dan di akhirat. Pada hari ini, khatib akan membicarakan tajuk “Falsafah Ibadah Haji Dan Korban”.

Kaum muslimin yang dirahmati Allah,

Sekarang kita telah pun berada dalam bulan Zulkaedah iaitu salah satu bulan daripada bulan-bulan haji. Bulan-bulan haji yang dimulai dengan bulan Syawal, kemudiannya Zulkaedah dan seterusnya sepuluh hari daripada bulan Zulhijjah merupakan musim umat Islam dari seluruh pelusuk dunia pergi ke Makkah al-Mukarramah dan kawasan sekitarnya untuk menunaikan fardhu ibadat haji yang merupakan rukun Islam yang kelima.

Ibadah haji adalah satu kewajipan yang telah ditentukan oleh Allah SWT ke atas setiap individu muslim sama ada lelaki atau perempuan yang berkemampuan, sama seperti kewajipan mengerjakan rukun Islam yang lain seperti solat, puasa dan zakat. Apa yang membezakannya dengan rukun Islam yang lain ialah ianya wajib dikerjakan sekali sahaja seumur hidup. Perintah menunaikan ibadah haji ini termaktub di dalam al-Quran melalui firman Allah SWT di dalam Surah Aali Imran, ayat 97:

Maksudnya : Di situ ada tanda-tanda keterangan yang nyata (yang menunjukkan kemuliaannya; di antaranya ialah) Makam Nabi Ibrahim. Dan sesiapa yang masuk ke dalamnya aman tenteramlah dia. Dan Allah mewajibkan manusia mengerjakan ibadat haji dengan mengunjungi Baitullah iaitu sesiapa yang mampu sampai kepadanya. Dan sesiapa yang kufur (ingarkan kewajipan ibadat haji itu), maka sesungguhnya Allah Maha Kaya (tidak berhajatkan sesuatu pun) dari sekalian makhluk.

Tuntutan wajib bagi menunaikan ibadat haji ke atas setiap umat Islam juga telah ditegaskan oleh Rasulullah SAW melalui sabdanya dalam sebuah hadis saih yang diriwayatkan oleh Imam Abu Daud rahimahullah dan Imam an-Nasai'e rahimahullah yang bermaksud :

Bahawasanya al-Aqra bin Habis pernah bertanya, Wahai Rasulullah SAW, “Adakah menunaikan ibadah haji itu wajib pada tiap-tiap tahun atau satu kali sahaja?”

Rasulullah SAW bersabda :

(Ya, yang wajib hanyalah satu kali sahaja. Sesiapa yang mahu menambahkannya maka haji tambahan itu menjadi tatawwu” (sunat)).

Kaum muslimin yang dirahmati Allah,

Sesungguhnya, setiap ibadah yang disyariatkan dalam Islam mengandungi falsafahnya yang tersendiri untuk dihayati dalam kehidupan. Begitu juga dengan ibadah haji. Antara falsafah ibadah haji ialah sebagai bukti keesaan dan keagungan Allah SWT. Tanda-tanda kekuasaan Allah SWT yang terkandung dalam ibadah haji sangat jelas dan tegas, sehingga penting untuk disaksikan dan dipersaksikan kepada seluruh umat manusia. Firman Allah SWT dalam surah Aali Imran, ayat 97 :

Maksudnya : Di situ ada tanda-tanda keterangan yang nyata (yang menunjukkan kemuliaannya; di antaranya ialah) Makam Nabi Ibrahim. Dan sesiapa yang masuk ke dalamnya aman tenteramlah dia ...

Tanda-tanda kebenaran di tempat suci itu begitu banyak dan jelas. Sangat penting agar seluruh umat manusia menyaksikan dan menceritakan hal-hal tersebut. Allah SWT memelihara bekas tapak kaki Nabi Ibrahim AS. Bapa para Nabi ini begitu gigih memperjuangkan ajaran tauhid sehingga Allah mengurniakan kepada baginda kemuliaan yang banyak, hingga bekas tapak kaki baginda diabadikan oleh Allah SWT dan ditempatkan bersebelahan dengan Ka'bah yang suci.

Di sana juga terpancar mata air zamzam iaitu mata air yang mengalir keluar dengan derasnya di sebuah kawasan lingkungan padang pasir berbatu yang jarang mengalami hujan. Satu bukti kekuasaan Allah kepada seluruh umat manusia bahawa Allah berkuasa melakukan apa sahaja yang Dia inginkan meskipun tidak lazim menurut perhitungan dan fikiran manusia.

Di sana juga ada bukit Safa dan Marwah yang menyaksikan keteguhan iman seorang ibu iaitu Hajar dalam menghadapi ujian, dan kesungguhannya mengatasi permasalahan yang secara sepantas lalu tampak mustahil untuk diatasi. Ketokohan seorang wanita beriman yang bukan sekadar mampu bertahan dalam keadaan yang sukar, malah berjaya pula mendidik seorang anak yang akhirnya menjadi seorang nabi iaitu Nabi Ismail AS.

Kaum muslimin yang dirahmati Allah,

Mereka yang belum berkesempatan mengerjakan haji pula, tetapi mempunyai harta dan rezeki yang mencukupi, maka sebagai umat yang cintakan Rasulullah SAW hendaklah mereka berazam melakukan ibadah korban sebagai mencontohi amalan para solihin agar kehidupan mereka mendapat keberkatan dan rahmat daripada Allah SWT. Galakan untuk melakukan ibadah korban ini termaktub melalui firman Allah SWT dalam surah al-Hajj, ayat 34 :

Maksudnya : Dan bagi tiap-tiap umat, Kami syariatkan ibadat menyembelih korban (atau lain-lainnya) supaya mereka menyebut nama Allah sebagai bersyukur akan penguriaan-Nya kepada mereka; binatang-binatang ternak yang disembelih itu. Kerana Tuhan kamu semua ialah Tuhan Yang Maha Esa, maka hendaklah kamu tunduk taat kepada-Nya; dan sampaikanlah berita gembira (wahai Muhammad) kepada orang-orang yang tunduk taat -

Dalam hadis riwayat Imam Abu Daud rahimahullah, daripada Abdullah bin Aun berkata, bersabda Rasulullah SAW :

Maksudnya : Wahai manusia, sesungguhnya atas tiap-tiap ahli rumah pada tiap tahun telah disunatkan berkorban. Sesungguhnya, apabila sesuatu perintah daripada Allah SWT dan Rasul-Nya, yang merupakan perintah wajib, sunat ataupun haram, semuanya mempunyai falsafah dan hikmah yang hanya dapat diketahui, kebiasaan selepas menuaikan perintah tersebut. Begitu juga dengan ibadah korban. Antara falsafah ibadah korban selain daripada bukti keesaan dan keagungan Allah SWT, ialah sifat pengorbanan.

Ibadah korban menyedarkan kita bahawa untuk mencapai sesuatu matlamat yang baik sama ada untuk kebahagiaan duniawi mahupun ukhrawi, perlu kepada pengorbanan. Oleh sebab itu, segala usaha dan buah fikiran yang diberikan dengan nawaitu yang betul, ikhlas dan bersungguh-sungguh dalam melaksanakan setiap tugas dan tanggungjawab adalah pengorbanan yang akan memberi keuntungan di dunia mahupun di akhirat.

Manakala, hikmah ibadah korban pula, salah satu daripadanya ialah seperti yang disebut dalam hadis Rasulullah SAW yang bermaksud : Daripada Abi Sa'ad al-Khudri radhiallahu anhu, bahawa Rasulullah SAW pernah bersabda kepada Fatimah radhiallahu anha, (Bangunlah, saksikanlah korbanmu itu. Sesungguhnya, titik pertama darahnya yang menitis itu diampuni bagimu dosamu yang telah lalu). (Hadis riwayat Imam al-Baihaqiy)

Kaum muslimin yang dirahmati Allah,

Justeru, sekiranya kita tidak berkesempatan untuk berkorban pada tahun ini, kita disyorkan untuk mengumpul wang bagi melaksanakan ibadah korban pada tahun-tahun yang akan datang. Sebagai umat Islam, marilah kita bersama-sama menyahut seruan Allah dan Rasul-Nya, agar melakukan ibadah korban. Sebabnya, setiap wang dan harta yang Allah SWT amanahkan kepada kita akan ditinggalkan di dunia sebaik sahaja tiba masa kematian menjemput kita dan yang kekal di akhirat hanyalah yang telah kita gunakan untuk berinfaq di jalan Allah termasuklah ibadah korban.

Di samping itu, dalam keghairahan kita melaksanakan ibadah korban pada kali ini, hendaklah dipastikan agihan daging korban itu sampai kepada orang yang benar-benar memerlukannya. Selari dengan seruan itu, perbanyakkanlah pelaburan akhirat dengan melaksanakan ibadat korban, dan amal ibadah yang lain agar kita diredhai oleh Allah SWT serta termasuk dalam golongan orang yang salih dan siddiqin. Allah SWT berfirman dalam surah an-Nur, ayat 51 :

Maksudnya : Sesungguhnya perkataan yang diucapkan oleh orang-orang yang beriman ketika mereka diajak kepada Kitab Allah dan Sunnah Rasul-Nya, supaya menjadi hakim memutuskan sesuatu di antara mereka, hanyalah mereka berkata: "Kami dengar dan kami taat": dan mereka itulah orang-orang yang beroleh kejayaan.

Program Hari Kebangsaan peringkat MATTARY

Sambutan Hari Kebangsaan peringkat MATTARY diadakan setiap tahun untuk memupuk dan menyemarakkan semangat patriotisme dalam jiwa murid-murid. Objektif lainnya pula adalah mewujudkan suasana dan persekitaran ceria di bulan Kemerdekaan yang dapat membantu dan menyokong proses pengajaran dan pembelajaran.

Pelbagai pengisian telah disusun seperti Pertandingan Kelas Patriot, Pertandingan Mewarna Poster untuk Tahap 1, Pertandingan Melukis Poster untuk Tahap 2 dan sebagainya. Suasana di sekolah semasa sambutan bulan kebangsaan sungguh meriah dengan kibaran bendera di setiap kelas. Johan Pertandingan Kelas patriotik telah dimenangi oleh Kelas 1 Al Farabi.

Pada 13 September 2019, Jumaat bertempat di Bilik Kuliah PATARY telah berlangsungnya Majlis Penutupan Sambutan Hari Kebangsaan yang turut dihadiri oleh Puan Dayang Siti Aishah binti Mohamad Atei, Wakil Ketua Bahagian Pelajaran. Majlis tersebut dimeriahkan dengan persembahan nyanyian, deklamasi sajak dan penyampaian hadiah kepada semua pemenang untuk pertandingan yang telah dijalankan. Penampilan murid-murid yang mengenakan pakaian bertemakan pakaian beruniform, tokoh dan pakaian tradisional menjadikan majlis bertambah meriah.

Diharapkan program ini dapat meningkatkan pengetahuan dan pemahaman murid tentang erti sebuah kemerdekaan dan menyemai rasa cinta kepada negara.



Al-Quran merupakan khazanah besar yang amat penting bagi umat Islam sepanjang zaman. Ia merupakan panduan atau manual kehidupan yang bukan sahaja diturunkan untuk umat Islam bahkan seluruh kehidupan sekalian alam. Umat Islam digalakkan untuk membaca dan menghafaz Al-Quran di samping memeliharanya daripada sebarang ancaman baik berbentuk fizikal maupun pemikiran. Umat Islam di seluruh dunia diseru untuk memantapkan ilmu pengajian Al-Quran dalam pelbagai cabang ilmunya seperti ilmu Tafsir, ilmu Tajwid, ilmu Qiraat, ilmu Quran, Tarannum dan sebagainya. Namun begitu, dalam usaha memantapkan ilmu-ilmu yang teradun dari acuan Al-Quran ini, amat penting untuk ditekankan mengenai adab atau pengurusan dalam mempelajarinya. Adalah merupakan satu kesilapan besar apabila hanya mempelajari ilmu dari Al-Quran tetapi adab dalam memeliharanya diabaikan. Ia juga mendatangkan kerugian dari pelbagai sudut terutamanya keberkatan yang sepatutnya diraih akhirnya menjadi nilai biasa yang tiada bezanya dengan ilmu-ilmu dunia yang lain.

Al-Quran adalah penyuluhan hidup setiap insan di dunia ini. Nilai dan pengajaran daripada Al-Quran bersifat menyeluruh dan mencakupi kesemua aspek kehidupan sama ada moral, perundangan, sejarah maupun peradaban. Keindahannya memberi kedamaian kepada jasmani, rohani, emosi dan spiritual insan-insan yang mahu mengamalkan dan menghayati setiap mutiara yang terkandung di dalamnya. Bahkan sesiapa yang mempelajari atau mengajarkannya adalah tergolong dalam golongan insan-insan yang mulia. Sabda Nabi SAW,



BENGKEL PEMANTAPAN PENGAJIAN DAN PENGURUSAN KELAS AL-QURAN

**“Orang yang paling baik di antara kamu adalah seseorang yang belajar Al-Quran dan mengajarkannya.”
(Hadith riwayat al-Bukhari)**

Oleh itu, majlis ilmu yang melibatkan pembelajaran Al-Quran haruslah dikekalkan dan dipelihara setiap masa. Pengurusan dan pelaksanaannya hendaklah sentiasa berada pada tahap yang terbaik demi memastabatkan kedudukan ilmu Al-Quran di Bumi Kenyalang yang harmoni ini.

Sehubungan itu, Bahagian Penyelidikan dan Pembangunan LAKMNS mengambil penting perkara ini untuk diberi perhatian justeru berbesar hati mengadakan bengkel untuk para guru Al-Quran LAKMNS bagi memantapkan pengajian dan pengurusan kelas Al-Quran yang berlangsung di bawah kelolaan LAKMNS. Berikut sedikit gambaran bengkel yang telah berlangsung pada 6 Julai 2019 yang melibatkan 42 orang guru Al-Quran LAKMNS. Bengkel disempurnakan dengan menjemput Ustaz Mohamad bin Solhi daripada Jabatan Pelajaran Negeri Sarawak (JPNS) sebagai penceramah jemputan.

Akhir kalam, program pemantapan kelas pengajian Al-Quran seperti ini haruslah diadakan secara berterusan pada masa akan datang. Program seperti ini sememangnya banyak memberi manfaat kepada perkembangan pengajian Al-Quran di Sarawak sekaligus membantu para guru dan pelajar Al-Quran dalam memahami dan menyampaikan ilmu Al-Quran secara mudah dan berkesan.





BIJAK KEWANGAN DEMI MASA DEPAN CEMERLANG

TAKLIMAT MAYBANK ASB FINANCING

"Wang bukan segalanya, tetapi segalanya memerlukan wang." Demikianlah ungkapan popular yang sering disebut oleh segenap masyarakat kita dalam melihat kepentingan wang untuk memelihara kestabilan hidup. Ungkapan ini sangat popular dan sering digunakan oleh para ilmuan maupun penulis-penulis buku berkaitan kewangan khususnya di negara kita ini. Melalui ungkapan ini kita dapat melihat dengan jelas bahawa manusia sangat memerlukan wang dalam kehidupan seharian. Tanpa wang, segalanya akan menjadi serba tidak kena.

Sehubungan itu, pihak Lembaga Amanah Kebajikan Masjid Negeri Sarawak (LAKMNS) memandang penting akan hal ini. Oleh yang demikian, satu taklimat telah diadakan untuk memperkenalkan dan memberi pendedahan kepada kakitangan LAKMNS khususnya para pegawai dan Ketua Bahagian mengenai Maybank ASB Financing. Taklimat ini telah berlangsung dengan lancar pada Khamis, 27 Jun 2019 bertempat di Tingkat 8, Baitul Makmur Kuching anjuran bersama Bahagian Penyelidikan dan Pembangunan serta Bahagian Pentadbiran, LAKMNS.

Taklimat ringkas ini telah berlangsung selama 2 jam bermula pukul 9.30 sehingga 11.30 pagi. Sepanjang sesi taklimat berlangsung, para peserta telah didedahkan dengan produk-produk kewangan Maybank terkini khususnya Maybank ASB Financing.



Para peserta juga telah didedahkan mengenai kelebihan-kelebihan yang diperolehi sekiranya membuat pelaburan dalam pelan ASB ini. Selain penerangan mengenai kadar dividen yang tinggi (7 - 8 %) yang akan diperolehi pada setiap tahun dengan tahap risiko pelaburan yang rendah, peserta juga diberi pendedahan mengenai status semasa pelaburan ASB di sisi kewangan Islam yang sering menjadi isu dalam kalangan masyarakat Muslim di negara ini. Taklimat diakhiri dengan sesi soal jawab yang banyak membantu para peserta memahami dengan lebih mendalam pelan simpanan dan pelaburan yang ditawarkan. Taklimat juga diakhiri dengan komen-komen positif serta cadangan agar diadakan lagi program seperti ini pada masa hadapan.

Semoga program-program pendedahan mengenai perihal kewangan seperti ini haruslah diadakan secara berterusan pada masa akan datang. Program seperti ini sememangnya banyak memberi manfaat kepada kakitangan yang mempunyai pendapatan tetap maupun sampingan dalam mengurus kewangan dengan bijak sekaligus membantu memartabatkan ekonomi Islam dan bumiputera di persada antarabangsa.

KURSUS

Pra Perkahwinan

Kemahiran mengurus kewangan merupakan suatu perkara yang sangat penting bagi setiap insan terutama di dalam era pemodenan ini. Ia bukan sahaja berkisar tentang bagaimana hendak memastikan kewangan kita kukuh untuk kegunaan hari esok, malah juga berkenaan bagaimana kita berbelanja hari ini. Pengurusan kewangan sangat penting terutamanya kepada pimpinan masyarakat, organisasi, kekeluargaan malah juga pasangan bujang yang ingin melangsungkan perkahwinan. Bagi pasangan yang bakal bergelar suami isteri, adalah sangat penting untuk membuat perancangan kewangan sebelum, semasa dan selepas perkahwinan berlangsung. Sebelum hari perkahwinan, biasanya setiap pasangan ada yang komited menyimpan RM300-RM500 sebulan selama bertahun-tahun. Ada juga yang memilih untuk membuat pinjaman puluhan ribu ringgit demi hari bahagia yang hanya sekali seumur hidup.

Seterusnya fasa setelah berlangsungnya perkahwinan. Kebiasaanya dalam fasa ini, pasangan suami isteri akan diuji dengan hebat dalam pengurusan kewangan. Semua perancangan melibatkan kewangan seeloknya dibuat bersama pasangan. Ini adalah untuk memastikan perbelanjaan yang dikeluarkan dapat dikawal dengan baik daripada kedua-dua pihak. Simpanan tambahan untuk masa depan seperti simpanan untuk pendidikan anak-anak misalnya, sangat penting untuk diambil perhatian. Antara simpanan terbaik untuk jangka panjang ini ialah simpanan berbentuk aset fizikal seperti emas atau harta tanah. Ini kerana simpanan seperti emas dan harta tanah terbukti berbaloi berdasarkan statistik nilainya yang sentiasa meningkat dari tahun ke tahun. Melihat kepada pentingnya perihal pengurusan kewangan kepada masyarakat terutamanya pasangan yang ingin berkahwin.

Pihak Lembaga Amanah Kebajikan Masjid Negeri Sarawak (LAKMNS) mengambil inisiatif untuk membantu dengan menganjurkan Kursus Pra Perkahwinan Islam pada setiap bulan. Kursus ini juga menawarkan sijil kursus Pra Perkahwinan yang merupakan antara syarat keperluan dokumen yang perlu ada dalam prosedur permohonan perkahwinan di Sarawak. Di bawah merupakan bilangan peserta yang mengikuti kursus Pra Perkahwinan di PATARY:

Bil	Tarikh	Bilangan peserta
1.	13 - 14 Julai 2019	85
2.	17-18 Ogos 2019	61
3.	7-8 September 2019	53

Para Penceramah yang terlibat dalam kursus ini adalah penceramah yang pakar dan berpengalaman dari Jabatan Agama Islam Sarawak (JAIS).

Diharap penganjuran kursus seperti ini dapat memantapkan kesedaran dan penghayatan peserta dalam perjalanan melayari bahtera perkahwinan. Semoga perkahwinan dan hidup setiap pasangan yang hadir juga diberkati Allah S.W.T selalu.



PENGURUSAN *Kewangan*

Ukur baju di badan sendiri, itulah peribahasa yang dikarang oleh nenek moyang kita dahulu untuk mengingatkan masyarakat agar berbelanja mengikut kemampuan diri. Pada siri kali ini, mari kita hayati antara langkah-langkah yang boleh diambil dalam pengurusan kewangan yang efektif.

I. Mempunyai matlamat kewangan

Pengurusan kewangan yang baik melibatkan matlamat jangka masa pendek, sederhana dan matlamat jangka masa panjang. Mulakan dengan matlamat yang paling jauh dengan memikirkan adakah kita mempunyai simpanan yang cukup sehingga tiba tempoh persaraan.

II. Membuat jadual perbelanjaan bulanan

Membuat jadual perbelanjaan bulanan amat penting kerana dengan cara ini kita dapat merancang perbelanjaan kita dengan baik dan tidak berlaku perbelanjaan secara berlebihan. Untuk menyediakan jadual ini kita perlu menyenaraikan semua perbelanjaan bulanan kita seperti ansuran kereta dan rumah, bil-bil air, elektrik dan telefon, perbelanjaan harian dan sebagainya. Lebihan daripada perbelanjaan ini kita boleh simpan di dalam bank.

Gunakan formula: Gaji – Simpanan = Belanja

III. Membezakan barang kehendak dan keperluan

Barang keperluan ialah barang yang kita perlukan untuk kegunaan harian seperti makanan, tempat tinggal, dan pakaian untuk kelangsungan hidup. Manakala, barang kehendak pula ialah barang yang tidak diperlukan dan barang yang kita inginkan atas dorongan nafsu.

Sebagai contoh, telefon bimbit canggih seperti Iphone 11. Kita mudah dipengaruhi oleh keluaran telefon bimbit model terkini dan mempunyai keinginan yang kuat untuk memiliki tanpa memikirkan tahap kemampuan kewangan kita. Sedangkan telefon bimbit lama masih boleh digunakan dan tidak mengalami sebarang kerosakan.

IV. Membuat pelaburan yang bijak

Simpanan yang telah dibuat adalah untuk dijadikan modal pelaburan. Tujuan pelaburan tersebut adalah penting untuk tabung persaraan, tabung pendidikan anak-anak, tabung bagi menunaikan haji atau umrah, dan apa-apa sahaja matlamat kewangan kita.

V. Pelan insurans

Pastikan anda mempunyai pelan insurans yang mampu melindungi diri dan keluarga secara komprehensif kerana kita tidak dapat menjangka apa yang bakal berlaku di masa depan.



...bersambung



Sudut Hafiz Cilik

Gelaran Yang Baik

Setiap orang mempunyai nama. Namun, kadang-kadang seseorang itu dipanggil dengan nama sebenar dan kadang-kadang dipanggil dengan nama panggilannya waktu kecil atau dengan gelaran tertentu.

“ Rasulullah suka memanggil seseorang dengan nama dan gelaran yang paling disukainya”
(Riwayat At-Thabarani)

Sebenarnya selagi panggilan itu baik dan orang yang dipanggil tidak keberatan, ianya tiada masalah. Namun jika panggilan itu buruk, membawa makna yang tidak baik atau orang dipanggil keberatan dengan panggilan, maka tidak boleh terus memanggil dengan panggilan tersebut. Panggilah rakan-rakan menggunakan nama yang paling mereka sukai supaya hubungan sentiasa baik dan akrab.

Allah SWT berfirman :
“wahai orang-orang yang beriman!
Janganlah sesuatu puak (dari kaum lelaki) mencemuh dan merendah-rendahkan puak lelaki yang lain, (kerana) harus puak yang dicemuhkan itu lebih baik daripada mereka dan janganlah pula sesuatu puak dari kaum perempuan mencemuh dan merendah-rendahkan puak perempuan yang lain, (kerana) harus puak yang dicemuhkan itu lebih baik daripada mereka dan janganlah sesetengah kamu menyatakan keaiban setengah yang lain dan janganlah pula kamu panggil-memanggil antara satu dengan yang lain dengan gelaran yang buruk. (Larangan-larangan yang tersebut menyebabkan orang yang melakukannya menjadi fasik, maka amatlah buruknya sebutan nama fasik (kepada seseorang) sesudah dia beriman dan (ingatlah), sesiapa yang tidak bertaubat (daripada perbuatan fasiknya) maka merekalah orang-orang yang zalim.”
(Al-Hujurat 49:11)

PROFIL KAKITANGAN

LEMBAGA AMANAH KEBAJIKAN MASJID NEGERI SARAWAK

Haji Mohamad Nidzam bin Haji Ahmad merupakan seorang pegawai daripada Bahagian Pentadbiran, Sektor Pentadbiran dan Pengurusan, Lembaga Amanah Kebajikan Masjid Negeri Sarawak (LAKMNS).

Beliau mula berkhidmat di LAKMNS pada 9 April 2007 sebagai Pegawai dan telah ditempatkan di pelbagai bahagian dan unit, dan kini ditempatkan di Bahagian Pentadbiran, Sektor Pentadbiran dan Pengurusan, Lembaga Amanah Kebajikan Masjid Negeri Sarawak.

Beliau yang juga merupakan anak bongsu daripada 3 adik beradik ini mendapat pendidikan awal persekolahan di Madrasah Datuk Haji Abdul Kadir Hassan, SMB(A) Majlis Islam Sarawak dan SMB St Joseph, Kuching sebelum melanjutkan pelajaran ke Matrikulasi UUM pada tahun 1999 dan meneruskan pengajian dalam Ijazah Sarjana Muda Pengurusan Teknologi di UUM Sintok, Kedah. Beliau juga sudah mendirikan rumah tangga dan telah dikurniakan 3 orang cahaya mata, seorang lelaki dan dua orang perempuan.

Antara kenangan manis beliau sepanjang berkhidmat di LAKMNS ialah pernah mengikuti Kem Waja Diri Siri 1/2008 di Kem Askar Wataniah Sermatan, mewakili LAKMNS dalam pelbagai acara sukan seperti bola sepak dan tenpin boling, pernah menjawat jawatan Timbalan Pengerusi Kelab MASJA-SA dan telah menganjurkan Karnival Sukan LAKMNS dengan jayanya pada tahun 2012 dan terkini pernah menjadi salah seorang urusetia yang terlibat dalam program LAKMNS Executive Retreat di Singapura pada tahun 2019.

Beliau kini aktif dalam sukan larian, menyertai beberapa acara larian dalam pelbagai anjuran luar dan gemar meluangkan masa beriadah bersama keluarga pada hujung minggu.



Gambar bersama keluarga semasa Hari Raya Aidilfitri 2019



Gambar kursus Waja Diri siri 1/2008 di Sermatan



Gambar terkini dalam larian Kuching Marathon 2019

PROFIL GURU MATTARY

LEMBAGA AMANAH KEBAJIKAN MASJID NEGERI SARAWAK

Cikgu Siti Najwa binti Jamaluddin Jugah atau lebih dikenali sebagai Teacher Najwa dalam kalangan anak-anak Ma'had Tahfiz Tun Abdul-Rahman Ya'kub (MATTARY) dilahirkan pada 3 Disember 1989 di Hospital Miri.

Merupakan anak kedua daripada enam orang adik beradik. Cikgu Siti Najwa telah berkahwin dan dikurniakan dua orang cahaya mata lelaki.

Beliau mula mendapat pendidikan awal di SK St Columba, Miri (Tahun 1-6) dan SMK Bako (Tingkatan 1-2). Selepas itu menyambung pendidikan di SMK Semerah Padi (Tingkatan 3-5) dan SMK Green Road (Tingkatan 6). Beliau melanjutkan pelajaran dalam Ijazah Sarjana Muda Ekonomi (Kepujian) di Universiti Utara Malaysia.



Memulakan perkhidmatan sebagai guru pelatih di MATTARY pada 22 Ogos 2016 dan telah diserap ke jawatan tetap pada 1 Januari 2017. Cikgu Najwa merupakan guru kelas 3 Al-Khawarizmi dan bertanggungjawab sebagai Ketua Panitia Bahasa Inggeris serta Penasihat Kelab Alam Sekitar. Manakala matapelajaran yang diajar ialah Bahasa Inggeris. Besarlah harapan beliau agar anak-anak MATTARY berjaya mencapai cita-cita mereka dan menjadi al-hafiz dan al-hafizah yang cemerlang kelak. In shaa ALLAH.



Gambar semasa menyertai kursus perguruan di Bilik Kuliah, PATARY



Bergambar bersama murid-murid semasa sambutan Hari Raya peringkat sekolah.

PROFIL PELAJAR MATTARY

LEMBAGA AMANAH KEBAJIKAN MASJID NEGERI SARAWAK

Dayang Nur Alyssa bt Nor Hisham merupakan murid Tahun 6 Al-Biruni. Dilahirkan pada 15 April 2007 di Kota Tinggi, Johor. Merupakan seorang pengawas sekolah yang tegas dan baik hati. Aktiviti yang sering dilakukan di masa lapang ialah membaca novel. Dayang Nur Alyssa bercita-cita untuk menjadi seorang doktor haiwan berpendidikan hafizah. Beliau merupakan anak ke-2 daripada lima orang adik beradik.

Antara memori kejayaan yang diperoleh beliau sepanjang berada di MATTARY ialah Johan Pertandingan Matematik Race, Johan Tarik Tali Kejohanan Sukan MATTARY dan mendapat Tempat Ke 3 dalam Kelas 6 Al-Biruni. Dalam bidang hafazan Dayang Nur Alyssa menghafaz al-Quran di bawah bimbingan Ustazah Fatimahtuzzahrah. Kini, Dayang Nur Alyssa telah berjaya menghafaz sebanyak enam juzuk.

Di sekolah, rakan rapat Dayang Nur Alyssa ialah Nur Qaseh Batrisyia dan Nur Izzah Amanina. Mereka merupakan rakan sekelas yang sering belajar bersama-sama dan mengharapkan kesemua mereka beroleh kejayaan cemerlang dalam UPSR kelak.

Di rumah pula, Dayang Nur Alyssa sering membantu ibu di dapur, dan meluangkan masa bersama adik beradik untuk menonton rancangan TV kegemaran. Antara pengalaman manis yang tidak dapat dilupakan oleh Dayang Nur Alyssa ialah pengalaman semasa menaiki bot pergi ke Pulau Helang dan menaiki jet ski di Langkawi.

Semoga adik Dayang Nur Alyssa berjaya mencapai cita-citanya dan menjadi anak yang cemerlang dalam apa jua lapangan yang diceburinya. Bagi pihak sekolah, sentiasa mengharapkan agar anak-anak MATTARY terus istiqamah mendalamai ilmu al quran.



Ketika menyertai pertandingan musabaqah Al-Quran MATTARY



Bersama adik beradik dan ibu yang disayangi.



Bersama rakan sekolah yang terlibat dalam aktiviti badminton

PROFIL PELAJAR TATTARY

LEMBAGA AMANAH KEBAJIKAN MASJID NEGERI SARAWAK



Mohammad Muzaffar Hadif bin Mohammad Faisal kini berumur 6 tahun telah dilahirkan di Hospital Umum Sarawak pada tarikh 6 Jamadil Awal 1434 Hijrah bersamaan dengan 18 Februari 2013. Muzaffar mempunyai seorang abang berumur 16 tahun dan 2 orang kakak yang masing-masing berumur 17 tahun dan 11 tahun. Muzaffar sangat manja dengan datuk dan neneknya kerana mereka berdua menjaganya dengan penuh kasih sayang semenjak dia dilahirkan.

Muzaffar dan keluarga tinggal di Taman Sukma dan jaraknya tidak jauh dari TATTARY. Di rumah, panggilan mesranya adalah Hadif. Seawal umur 4 bulan, Muzaffar telah dihantar ke Taska Harmoni. Ketika berumur 4 tahun dia mula bersekolah di TATTARY dan kini berada di kelas 6 Bijak di bawah bimbingan Cikgu Al-Nur Zarifah, Cikgu Rosila dan Cikgu Anis Rozieyah.

Hobi Muzaffar adalah membaca buku, menonton televisyen dan bermain badminton. Seperti anak-anak lain, Muzaffar menggemari ayam goreng, spaghetti bolognase, kuih donut, coklat, dan minuman milo ais. Buah-buahan yang diminatinya ialah tembikai, durian dan manggis. Dia akan segera menghabiskan buah-buahan yang dihidangkan setiap kali pada waktunya makan di tadika.

Sikap Muzaffar yang pemalu membuatkan dia disenangi dan mudah dijaga. Manakala sikap ingin tahunya pula menjadikan Muzaffar suka bertanya terutama sekali kepada ibu bapa dan datuk neneknya tentang perkara-perkara baru yang dipelajari di sekolah.

Berkat usaha guru-gurunya, Muzaffar mampu menguasai bacaan iqra' dan menghafaz juzuk 30 dengan baik. Begitu juga dengan pencapaian akademiknya, dia sudah boleh membaca dengan lancar dan sangat meminati mata pelajaran Matematik. Dia juga suka menjadi imam semasa solat bersama kakaknya di rumah dan di dalam kelas. Cita-cita Muzaffar satu hari nanti adalah untuk menjadi seorang inspektor polis. Justeru, dia sangat suka menonton filem Polis Evo.

Semua ahli keluarga dan para guru sentiasa mendoakan agar Muzaffar mencapai impiannya menjadi polis berprofil al-hafiz. Didoakan juga agar dia dan kawan-kawannya dapat mencapai cita-cita mereka dan berjaya dengan cemerlang di dunia dan akhirat.



Gambar kenangan adik Muzaffar bersama keluarganya.

BERSYUKUR DAN BERSABAR

Daripada Abu Hurairah RA daripada Rasulullah SAW bersabda:

“Apabila seseorang daripada kamu melihat kepada seseorang yang diberikan kelebihan pada harta dan fizikal, maka hendaklah dia melihat kepada seseorang yang lebih rendah (atau kurang) daripadanya.”

(Hadith riwayat al-Bukhari, No: 6490, Muslim, No: 2963, Ahmad, No: 7800).

Pengajaran Hadith :

Allah SWT telah menjadikan manusia dengan sebaik-baik kejadian. Allah SWT juga memberikan kepada setiap hamba akan kelebihan dan kekurangan dalam sesuatu perkara sebagai ujian. Menerusi ujian tersebut Allah SWT akan menilai hakikat keimanan seseorang hamba, adakah dia benar-benar bersyukur dengan kelebihan atau bersabar di atas kekurangan yang diberikan.

Seseorang hamba yang benar-benar beriman akan memiliki hati yang sentiasa mengekalkan sifat syukur dan sentiasa menjauhi sifat hasad dengki serta mengurangkan kerisauan hati kerana mengejar harta dunia. Syukur dan sabar dengan ujian dan godaan dunia seperti kemiskinan dan musibah boleh diperoleh secara memandang kepada orang lain yang lebih daif atau yang lebih rendah daripadanya.

Memandang kepada seseorang yang memiliki kelebihan harta dan fizikal akan menyebabkan bertambah keinginan atau kerunsingan yang membawa kepada kedengkian dan mengikis sifat syukur. Adapun jika memandang kepada seseorang yang kurang daripadanya, maka ia akan menjadikan seseorang itu lebih bersyukur, bertambah ketenangan dan merasa cukup dengan pemberian Allah SWT.

Sumber Rujukan :

Kitab Sahih al-Bukhari

Kitab Sahih Muslim

Kitab Musnad Ahmad

Kitab Fathul Bari Syarh Sahih al-Bukhari Li Ibn Hajar al-Asqolani

Kitab Mirqatul Mafatih Syarh Misykatul Masobih Li al-Syeikh ‘Ali al-Qari

Kitab Dalil al-Falihin li Thuruq Riyadh al-Salihin Li al- Syeikh Muhammad bin Allan As-Siddiqi

Kitab Nuzhatul Muttaqin Syarh Riyadus Salihin Lil Imam al-Nawawi